

泰西各國新政考

一
函
四
冊

新
子
船
學

PDG

金直鄒 費翰飛氏編輯

沿革考

創世

西國舊古之史存猶太國名創世記或名猶太經亦名猶太史國中抱殘守缺珍若連城相越數千年不能更易一字今耶穌教舊約皆本此書有埃及希臘拉丁等文字之分創世記載天主創造天地人物之事謂首先造一男人曰亞當即取亞當之肋和土造成一女曰厄娃爲亞當之配初意欲令二人永生世間安享奇福故棲以一地曰樂園園中動植各物皆備二人裸處其中不知不識當天主之造天地也共分七永時亦名七日(所謂時日者非一日十二時之謂乃自始至終一永期也每日或數年或數十百年凡成一事之期曰一日)第一日造明體日光之類是也第二日造天分上下第三日分水陸第四日造植物第五日造動物第六日造亞當於是天主創造之事已畢第七日乃休息今教中每七日一禮拜休假一日意即本此與易七日來復之旨暗合造人後天主命二人奉律守戒園中各物皆可以食惟一樹之果曰善惡果不可食蓋已予二人自主之權欲試二人能否順己也既而厄娃爲惡鬼所愚誘夫食戒果天主怒示之罰於是羞恥定生死傳至於今永以爲例凡兒生墮地必哭以其原罪未除懼生於世

此雖說近不經然非盡無所本事在前歷四千九百六十二年其後孳生蕃息亞當之子曰識德識德之子曰厄諾斯厄諾斯之子曰該南該南之子曰馬辣勒爾馬辣勒爾之子曰耶埒德耶埒德之子曰厄諾格厄諾格之子曰慕多撒臘慕多撒臘之子曰拉墨客拉墨客之子曰諾藹（耶穌教名曰挪亞卽諾藹同音也）諾藹之子三曰生曰岡曰亞弗得其時上天示罰大雨不息洪水橫流先是人類孳長由三人而生衆人至是大水爲災惟諾藹一家以預避高山得免是謂三族之始水退後復將所携動植各物分布四方於是生居亞細亞洲（亞細亞本土其府城之名西人遂以名其洲）岡居阿非利加洲亞弗得居歐羅巴洲均在地中海三洲分界相近事在前歷三千三百餘年至中國伏羲則在前歷二千九百五十二年時洪水早退世可居人故三族子孫蔓衍各處至帝堯時所記洪水乃泛濫之餘波非水之極盛也總按天地開闢人類肇興始於亞細亞洲其餘均由此推廣中國所謂盤古氏疑卽指生而言所謂天皇地皇人皇疑卽諾藹三子當時人壽極長要皆八九百歲但文字未興不知載筆祇賴記憶流傳久而失據故西史所載雖似可據亦在疑似然間之學者理貴求真不得以事出無憑不復詳考根柢也

非利息亞

亦名非利亞

泰西古國首推非利息亞在地中海之東卽今達米厓欄一帶乃交易商市也太古人民渾噩無所爲國不過海岸一處市集四方相聚載貨而來均於是處互相交易是處附近有大準四曰賽墩曰泰亥曰埃

練兜曰皮羅脫相去或數十里或數百里而均以非利息亞爲總匯故總名非利息亞初不與中國相通故此處已爲泰西善地興起約數百年其創立之始已無可考今所存者祇皮羅脫一埠耳據西國百史載希伯來人赴猶太國時非利息亞已成市會地濱大海土人精造船艘當初所造之船編木爲筏或斷大木而空其中以爲濟渡之具所用斧斤始以石繼以錫後以銅迨知用鐵而船制亦漸精良可用人力駛行近處於是非利息亞商務漸東與埃及羅馬印度交通貿易其後阿剌伯回教興起駕非利息亞而上之非利息亞因日就衰微不能復振矣

亞蘇利亞

亦名亞細亞或名西西亞

亞蘇利亞與巴庇侖壤地相接界啼格力斯與弗林提斯兩江之中京城名曰奈斯又名尼尼佛或謂與埃及同一鼻祖故言語微覺近似境中商賈殷繁人民富庶時懋遷之盛首屈一指故各部皆附從焉然風氣尙侈一有贏餘敗度縱欲靡所不爲絕無務本善後之思於是米代巴庇侖崛起雄才大略智勇天生畏服者多率衆謀叛事在前歷六百二十年旣佔亞蘇利亞改國號曰巴庇侖加拓京城廣大堅固關城門百環若蜂房門皆以銅爲之後傳位於納筆葛司商務益興由是崇尚驕奢國用漸竭後被波斯國王賽雷司所滅國遂亡

茹弗癡

茄弗癡在阿非利加洲之北埃及國之南近地中海濱卽今吐逆司海灣之地也前歷約八百年非利息亞人分居茄弗癡築都會名曰新城貿易通商日形繁盛土人愚惰不習時務而遠來客商日出智力以相角久之反客爲主遂開拓地中海及愛而基力歐西班牙一帶小海島鯨吞蠶食遠近皆附版圖全盛時新城居民約七十萬羅馬旣興屢開兵戰前歷一百四十九年漢景帝元年羅馬傾國來攻盡屠土著倖獲生者亦都被驅逐大兵之後祇剩居民五萬餘名遂不復成國

依的努比噠

依的努比噠在埃及之南卽今努比噠之地前歷二十二年羅馬率兵攻伐依國女王名根臺響力不能勝遣使赴羅馬軍獻犒羅馬王憐其恭順並不取地舍之而歸未幾又至依王以前諸相責羅馬兵適苦疫乃星夜引去其京城民俗雖極殷繁然不如附近大埠名末路依者爲富庶此埠居於孔道五方雜處烟戶如雲當時有京城萬戶不如商埠百家之諺以後日形窮促不知所終

埃及

埃及國在地中海濱建國先於亞蘇利亞因而閉關自守民情國政不與他處往來又不許他國之船入境且無文字可以記載故不能考其所自始大約立國在夏商之朝始祖美內士在前歷二十二世屢與猶太交兵二十六世參美底姑在位乃混一之子尼古立欲繫葉峽損民丁二十萬且又爲猶太所敗國

漸弱二十九世僅擁土壤卒爲波斯所滅前歷二千八十四年後埃王皆以畜牧爲生前歷一千六百七十八年伊西比阿女曾尼多格里兼王埃及二十二世西薩格在位埃及爲伊西阿比所侵國大亂再傳愈弱孟非使按察薛登叛稱王紀綱紊亂十二王爭起雄霸各方而以參美底格爲最與衆不和借希臘海盜力逐十一王統領全國時前歷六百五十六年也王旣一統開闢招遠關道通商子尼哥立喜拓土置海軍欲繫紅海達地中海興工一年死者十二萬人役遂罷前歷六百十一年與猶太戰於加美耳山破之又與巴比侖王尼布加得尼戰敗績埃失亞細亞地三千八百餘年孟非使傳十六世非格索司來侵建下埃及十七世始歸一統王亞美諾非使第一第二頗有建立十九世後教士專權多內亂百十七年至七十一王桑滅格司在位始與他國相通政事紀綱竭力振作治道蒸蒸日上迨參美尼多立爲波斯所擒仰藥死國亡事在前歷五百二十五年後波斯將軍多里美拉基據埃稱王威聲大著歷四傳至女王姑婁巴多拉有殊色凶殘無倫將士惑而傾心國遂失於羅馬時希臘國人羣赴埃及希臘本有教化埃及人乃爭習希臘文教一氣貫通然女王不能復國也後羅馬又分東西直至西歷六百四十年爲沙蘭生人所擾國又爲回教所屬土耳其興起旋歸於土鎮二大帥使馬默羅古兵守之法王破命第一起大兵來攻土人會戰於金字塔下殊死鬪仍敗國遂屬法當前歷三百三十二年希臘管西多尼亞希王大亞力山打潛師攻埃及勝之卽在奈兒河口建大城以己之名名之數傳至託勒密的第二

從奈兒河接濬長渠直達紅海數世而功成先是奈兒河常有水患渠成患稍平迨國爲羅馬所滅國學向藏各國信史至是盡付一炬埃既歸法叛服無常一千八百有一年英兵來攻法大敗英將亦受重傷法兵去埃及又歸土耳其封墨非麥德阿利爲王大興海陸軍政國勢漸盛一千八百三十四年叛土自立後仍稱藩然亦徒擁虛名也

希臘

希臘本古時小國教化文字最爲講求故哲士通人爲各國之冠古史謂希臘創始初爲小部落十餘處其最著名者一曰以色列一曰哥林多一曰拉哥士一曰彌撒尼亞一曰哀的加各小部落紛處各方其後合成大部總名希臘合國後特建大埠兩處一名愛斐林卽京都也一名閣陵豐爲希臘外省又在小亞細亞設立商埠曰梅里忒司曰尼非瑟司曰司末乃曰無胥亞曰裴相的姆裴相的姆爲近海要邑初本荒地平蕪片壤廣漠無垠希人見四通八達形勢絕佳遂經營而成此埠由是招徠遠客商務繁興百貨雲屯居民極爲富庶希臘之人倚之若外府焉時羅馬興起其王君士但丁亦名剛斯當定有囊括四合併吞八荒之心羨裴相的姆之富率師來侵竟爲所奪改爲東羅馬京城以王之名名之卽今之土耳其京都蓋當時羅馬王恃此爲東道之主藉此席卷而東以吞各國者也

希臘國史記載希臘在歐洲南如一臂斗出地中海盡處似掌上古時諸藹裔日躔居小亞細亞有渡海

峽而西者始知希臘已有伯刺斯日族享的士族列斯日斯族野居洞穴衣皮茹血祭用人牲事在前歷二千二百五十六年前歷二千年間伯刺斯日族建國北境曰昔西恩九十餘年後埃及人立的丹國旋散而迦南人義納孤又築革斯城前歷一千一百五十六年埃及人立阿的加國後改名雅典國前歷一千五百十九年腓尼基人迦達建德巴城製耒耜教耕種造文字鍛金鐵鍊兵器釀葡萄酒俗一變焉前歷一千四百九十八年昂飛的安爲雅典王多戰事外來者各自分據王遣使與十一國盟每國出議員二人歲兩聚於公會侮神違律者共懲之又駕舟地中海廣通貿易國以富強治道燦著王死太子德修立分國人爲三等曰爵紳曰工藝曰農民而爵紳之權日盛農不能堪王緝合十一國抑損豪貴民爭歸焉雅典遂爲大都會後二百餘年國中有三大戰一在拿格爾丁一在德巴一在禿累禿累之役在前歷一千一百九十三年後政事稍修歷八十年鐸利亞來寇希人多遷避十二國中有名士帕太者本爲米西那王所轄而失於黑拉古烈亡已百年其裔復奪取之時小亞細亞之避難希人不爲本會所強制雅典羨之遂改君主爲民主推一長官治事曰亞爾干以本地富人之有權者任之權視王稍殺著爲定憲以哥德落之後爲繼於是諸國皆去王號惟士帕太不去（士帕太於前歷一千一百餘年有歐里德兄弟同爲王同朝治事竟歷九百年不死）前歷九百年間士帕太王族利古爾尼傑起更定便民之律創議已定利遁去絕食餓死民思其功誓永遠遵律凡五百年雅典自設民主哥德落子孫世襲三百三十

一年歷久生弊議改亞爾干三年更任尋定一年一更此後國中人才蔚起名望最重者名梭侖未幾梭侖同族畢司夥拉都崛起好勇疏財遂取雅典不遵民主律竟自稱王後以壽終時前歷五百二十八年也太子義比亞立能修父政後因士帕太捕其子王悲之請和旋去位出奔波斯雅典又改民主前歷四百九十二年波斯王大留士以水陸軍攻希臘雅典懼遣使士帕太請發兵合攻於馬拉敦竟勝後波斯前來復仇仍爲雅典士帕太所敗既勝波斯國家無事漸生驕侈諸部妬殺如仇敵士帕太根本日衰而雅典之勢日盛士帕太忌之及雅典地米斯多卽位大興海軍兩國遂啟爭端前歷四百四十年雅典以比利吉爲統領（卽國王也）爲盟主十四年諸國畏服前歷四百三十年士帕太攻雅典比利吉歿死乃公立克勒恩旋共議和未幾又戰雅典敗士帕太大將國雅典二年雅典逐臣達拉西澤路戰勝之復得自主後又殺其大賢索克國人皆不謂然前歷三百七十一年士帕太與雅典及德巴戰不勝王與親臣皆沒後馬其頓國興起（初爲佛西亞人亦希臘列邦之一居於北方建國十九朝時王名非列興後國滅於羅馬）希臘稱臣恐後者十餘年旋以西西恩王爲盟主時前歷二百八十一年也前歷二百七十八年高盧將百蓮那以兵十六萬五千伐希臘百爲法蘭西別族有勇略所向無敵至是全軍盡墨百僅以身免時馬其頓尙轄希臘至前歷一百四十年西西恩王逐馬其頓守兵士帕太拒之不勝敗走埃及值希臘衰敗祇有厄多里部而尙爲亞該亞所惡厄多里屢被蹂躪遂降羅馬羅馬旋又陷亞該亞入希

臘於是希臘遂亡直至西歷一千四百五十年土耳其取希臘奴使其人不堪一千八百二十二年希人叛土棄希臘一千八百二十四年又爲埃及所陷英俄法三國助希臘希將以三國兵擊土軍大勝未幾俄人不喜英人助希大兵攻之英約法合拒遂立約乃立巴威略王子阿多一千八百四十八年希人叛英尋服今希臘國勢方興若治政有人尙堪爲國也

羅馬

羅馬創始於拉兜希臘史載初有希臘族人亞加地遷族於意大利之拉兜當希臘衆國城陷時禿國太子遁拉兜爲王國號辣丁其子遷都於亞巴龍牙數傳至糯米多爲弟阿馬流所弑阿婁女守貞神巫也竟產二子曰羅馬路曰列馬士阿生埋姪女棄二子於河北狼乳之旋爲牧人牧養及長殺阿馬流二子又自相殺列馬士阿被兄手刃羅馬路遂卽王位時前歷七百五十二年也羅馬既立推廣招徠男子四集而少女子乃誘薩伯尹國婦女至命國人奪而妻之薩王怒大舉來伐王以所掠婦女列陳薩王氣沮請和羅馬路旋併其國王更改國政設騎兵爲侍衛名力古多是爲騎族之始又選都口大族爲議員名西那多子孫世襲是爲貴族之始又立庶族皆由隣邦來者位殺於貴族貴族奴視之後因此肇亂羅馬路死一傳至奴馬本比留乃撒伯尹人也及死傳位太子時亞巴與羅馬並興羅馬賴大將何拉周之力角勝併亞巴大將墨都士不服嗾他國並攻不勝墨都士被裂屍死亞巴亡迫安哥爲羅馬王拓地通商

前歷六百十六年卒乃立哥林多人達耳貴牛備城垣濬水道政事勤勞爲前王安哥之子遺俠客〔牧人也〕斫死遂立塞爾彪分全國爲三十鋪鋪置司法官課徭役是時都中可得兵八萬四千七百人貴族叛王被弑公立盧酋士淫虐無道太子節士多尤甚強姦貴族女國人怒逐王出奔乃不立國王祇置統領二人攝政時前歷五百九年也盧酋士欲復位每嗾他邦屢開兵禍羅馬勇將何拉周義士模秀力禦之不勝後乃立總統選於貴族以六月爲限威權無匹自此貴族之勢益張庶族苦之又不能與敵前歷四百九十四年民相率去國政府懼遣使留之願任公選民長三人可以權抗執政貴族不得與聞民乃止適歲歉民皆思賑貴族馬爾秀哥略拉那謂須廢民長方放賑民怒逐去之前歷四百五十一年議定國律置長六人三選於貴族三選於庶族由是庶族勢日盛未幾廢執政前歷四百三十年置司戶令國中鰥寡相配前歷四百餘年攻伊歐十年始拔前歷三百九十一年高盧人起兵攻古路首羅馬救之高盧乃移師攻羅馬前歷三百八十五年彼此大戰羅馬大敗高盧兵入羅馬羅馬棄城退保加此多倫旋招迦美路爲上將大破高兵然元氣虧損前歷三百六十六年庶族塞士達始擢執政嗣三百年權皆與貴族埒而爭端亦息矣前歷二百九十年前屢於隣疆參尼的戰參尼的竟歸羅馬而前歷二百九十七年底逸耳拿之役二百九十五年先地嫩之役尤爲劇戰後又降薩伯尹服高盧國勢益強前歷二百八十年敗於耶卑路王非耳留之象隊尋仍降羅馬而下意大利亦爲羅馬所併尋與迦太基構釁迦魯

舟師大將兌留遣飛橋破之前歷一百四十二年大破迦太基兵船於耶客的島迦乃請和讓西齊里地
羅馬乘隙取迦太基之薩丁及哥塞牙二島前歷二百二十三年迭破高盧兵高以上意大利來降前
歷二百十九年羅馬大發海軍一向西班牙一向阿洲時迦將小漢尼巴欲報父仇誓滅羅馬知羅馬兵
遠出乃率兵閒道攻羅馬大勝破上意大利明年進中意大利羅馬兵每戰輒敗羅馬尋以馬耳色羅及
西北阿先後爲將破小漢巴尼又進言於迦太基間之小漢巴尼內無援兵外逼強寇遂出奔西里亞羅
馬攻之竟服毒死羅馬大喜前歷一百四十六年陷迦太基(陷後迦民殉國者極多)大將西北楊之功
也前歷一百二十三年加俞又爲民長欲民人各主其權不服俞者聚黨攻擊國又小亂旋又破日爾曼
族深撥爾時意大利欲爲民主請於羅馬不許遂有連合部之亂二年始平而都人蘇拉欲廢民主結黨
內訌抗民主馬黎亞勢漸盛前歷八十三年直入羅馬黨人內應殺戮極慘蘇遂自稱總管前歷七十八
年深悔昔非乃隱去貴族牛朋表繼之遣將捕馬黎亞黨塞多留於西班牙塞兵數千羅馬兵十二萬兩
軍血戰數年無勝敗乃購刺客刺塞多留戰事以平後數年朋表進亞細亞蹂躪三大洲滅國十五拔都
邑四百至前歷六十一年凱旋自後國中富庶文教大興而三雄歲薩兒等崛起權勢又分卒互相擊戰
爭數年朋表爲埃及所殺歲薩兒遂爲羅馬總統行皇帝事朋表黨又密殺歲於議事堂朋表像前而
以安多尼爲總統時前歷四十三年也歲既死都人念之其妹孫阿大維擊安多尼大勝自登政府與安

議和時列比鐸者亦崛起爲難於是三人公約號曰後三雄阿大維尋滅埃及前歷二十九年卽皇帝位改官修政總跨歐亞阿三洲而治之兵力強盛國中富庶習尙豪奢前歷十四年王死提庇留卽位爲王后所弑尼羅卽位性狐疑暴虐輕學士焚殺耶穌教人卒爲臣下所殺立太子加俞衆愛戴之王後得癩疾暴甚其父衛軍加勒亞弑之乃立葛老司登爲其后所弑尼羅立后前夫之子也年弱冠亦殘暴殺異父弟比利登又惑婦言殺母后宜是阿大維時耶穌降生率其黨傳教猶太祭司忌之訴之監官彼拉多釘耶穌於十字架至是耶穌大弟子伯都祿亦罹是刑此刑爲羅馬處死賤役之刑蓋所以辱之也又有弟子保祿被斬尼羅旣暴民怨沸騰一朝叛起外寇乘之王出奔爲臣下所殺於是加拔與屋多及威的路三人相繼爲王威的路有異稟好喫戰死之人穢氣羅馬人又叛擒王至通市塗泥其身而斬之眞首予上西歷六十九年以將軍非士巴爲王時親衛軍威權日盛議官徒有空名王尙節儉振威武留意學術優待教徒衆庶樂業猶太叛王征之滅其國死者枕藉王嘗與荷蘭及西希利戰尋盟乃築廣場令人與獸鬪亦惡政也第度立羅馬大火王賑之二年而卒王之弟米多山立煩刑苛斂民不能堪欲誅其后反爲后所弑九十六年涅爾華立年已七十溫厚和平民皆樂業自後八十年任賢舉能國稱極盛王在位二年義子大刺長代之勤政十九年以哈的連爲王恐治不能遠棄達西地令西里亞阿爾美尼亞自主欲廣見識遊歷各國一百三十八年彪斯嗣立慈惠愛民凡二十四年禪位馬古奧利留與巴爾的攝

兵至二百六十五年始息馬哥曼又來犯境國勢稍衰一百八十年太子繼位卽爲亂兵所弑乃立其將
巴低勒司亂兵又弑之議員以重金賂衛兵欲圖寶位各鎮皆入羅馬爭帝國中大亂篡弑頻仍直奧里
賈卽位始再中興仍爲其下所弑二百八十年地克里生立與馬西密連同爲王旋又引君士坦周與加
拉利爲王國分爲四忽君士坦周死子君士但丁繼立旋又立色弗拉斯與馬士美同爲東帝立馬西密
連之子貌仙爲西帝於是國有大帝爭亂紛仍三百二十三年後五帝皆滅君士但丁統一區宇東至波
斯西距大海南盡阿洲北境北及比利敦未幾遷都而東築京城曰東羅馬卽名君士但丁城及卒三子
三分全國後國多爭亂相傳十二帝至羅麻盧被日耳曼所廢西羅馬始亡時一千二百二十四年也
西羅馬旣亡東羅猶亘歐亞阿三洲而紀綱不振民力凋敝悍族起於北方屢屢侵侮恩諸在位之三年
意大利脇索歲幣國中苦之四百八十八年王親征意大利三戰皆捷三年拔之於是西恩力及多腦河
南之地盡來附屬治道稍張四百九十一年后鳩恩諾立所私之俺難大內訌不已旣而王震死將軍色
司定第一爲王爲政寬和而待教徒甚刻五百二十七年王死立從子色司低尼安第一欲復舊業后賢
明英斷本女優及爲后王頗得內助時有青黨綠黨爲亂后助王設計平之收復阿洲北境失地滅汪得
羅伐峨特恢復意大利波斯忌舉兵來使別利沙留拒之（羅馬大將恢復意大利者）五百四十一年峨
特攻取意大利并破拿破里別利沙留仍將意大利奪回旋懼於波斯與之和歲輸銀三萬六千而不能

用別利沙留覺結盲雙目而國勢益衰矣五百六十五年色司定第二立開鸞衛例忌大臣拿爾色拿叛誘倫巴多王取意大利五百七十八年王卒將軍提比力爲王越四年傳位於將軍毛裏修時波斯篡亂乃遣兵伐波斯五百九十九年營將忽迦司捕毛裏修一家盡殺之六百年國人殺忽迦司立希辣格楞波斯又來侵地王親征之波斯敗諸國聞風來朝晚年與沙蘭生戰失亞細亞全部王卒後三世皆爲人所殺六百六十八年君士但丁第四立沙蘭生入寇十年沙蘭生力屈始服六百八十五年色司底尼亞第二立忍驚不孝人心離叛被大將黎勿丹截割鼻舌繫獄中自卽王位旋亦被殺提庇留爲王越六年色司底尼亞第二仍復位爲國人所弑腓立比嗣之二年被廢目被挾國人欲立安諾達修懼禍遜位再立帖奇多削又遜之乃以將軍勒阿第三爲王七百十七年沙蘭生大舉來攻又因開罪教王失意大利大半及勒阿第二立一傳君士但丁第五再傳勒阿第四皆禁天主教直至女帝伊蓮（勒阿第四之后君士但丁第六之母）登位始開其禁後伊蓮被放乃立泥色佛羅戰事不息王陳亡米給爾第一登位見時勢艱難讓位於將軍勒亞第五爲下所弑八百二十一年米給爾第二立盜賊甚多處以極刑八百二十八年王死立帖阿法路公正無私及死國人情之一傳至米給爾第三何修與教王惡立希臘教再傳至巴西利三傳至約翰第一四傳至巴西利第二與蒲加零戰獲敵兵一萬五千盡挾其目蒲王慟死國遂亡時國家奢侈廣設衛兵一千六十八年女后在位出罪人日苛熱尼於獄而嫁之日遂爲王伐土

敗績遜位於泥塞弗拉將軍亞立修廢泥自立自一千八十一年至二百四十年國事日非篡弑不以爲異十字軍興起侯爵巴多尹代希臘爲王號曰臘丁自是羅馬與臘丁爲一王矣一千二百二十二年巴多尹第二立因奪后與不而根敗岬后及國母被殺王以憂死立巴多尹第三幼冲繼服人心渙散國勢不支伯倫人若翰以老成攝政國賴粗安若翰卒一千二百六十一年泥塞亞王巴略以大兵來攻苦戰不息又掘地道感之君士但丁陷王出奔臘丁建國五十七年而亡諸藩屬亦失去巴略遂自稱全國總王一傳至若翰第五再傳至蠻奴利三傳至君士但丁第十三而東羅馬已無復存矣

別史氏曰羅馬古國始於周宣王時初以耕牧開基富蠶食侵掠遠略所及有得地而仍舍之去者由秦而漢歐洲盡入版圖成爲一統當剛斯當定(卽君士但丁)在位兵力益強每侵攻他國大準剽其金帛而歸凡得一地苟地方富饒可以肥己者卽派大員一人駐紮其處以爲監司其處政令之權皆操監司之手爲監司者往往貪婪逼索任其苛求百姓之財多入官府監司卽將所得贓賄携歸羅馬故羅馬京都繁華靡麗富貴豪奢駉駉乎琢玉成樓布金滿地焉法國羅馬一統志載當時奢華之俗舉國若狂每宴會一次有用數十萬金者珍味中用孔雀之腦犀牛之髓或以珍珠寶石金鋼石和製茶食中分以宴客客得之卽爲己有其濫費如此有富人某襲先人餘蔭造大梨園一區工程之費至三千餘萬金能容八萬人從容坐賞演劇一夕費九萬餘金其時富人之多指不勝屈家有十萬金已爲極貧之戶人皆輕

之甚有藏蓄太多欲費用而不可得者中人家尋常器皿多以金銀爲之此時國運昌明茹弗癡埃及希臘西班牙英吉利日耳曼土耳其法蘭西小亞細亞臣服恐後前歷三百三十年東晉成帝時又奪希臘之裴相的姆重加修整用經費數千萬金此處水程通地中海陸程通希臘及東方諸國於是西羅馬相率東遷享國約一千載西歷五百餘年得蠶種於印度因考求飼蠶之法惟全盛時但尙驕奢不思營後務本之道置而弗求漸至元氣凋敝無可自恃而德意志瑞典瑞威等國土匪名各夫黨者潛滋暗長一朝起事奪其東京焚毀一空雖旋即散去而國威從此不振本國又有匪類名很黨者早蓄雄圖於羅馬盛時已謀不軌會目曰阿的蘭率衆攻佛尼斯郡佛尼斯人避難至愛得奄獨克海濱久之成族追其所自卽名佛尼斯國佔土地約二萬里復將地中海散潑來司島該第鴉島愛烏尼島三處收之通商貿易製造船隻富庶之麻蒸蒸日上其後各夫黨屢次來攻西歷明天順七年卽一千四百六十三年東羅馬爲阿剌伯所併祇贖西羅馬爲天主教王京城追意大利興而西羅馬亦爲所併羅馬雖亡羅馬盛時有屬國名哲奴鴉者與佛尼斯同興歷國一百三十年時有小國一名丕散一名福祿林司壤地無多自成一處其小國之在意大利者一名矮馬飛一名俺苦難一名婆羅那一名弗拉拉一名模低那一名羅迦一名蜜蘭一名孟多阿一名畢潞格鮮一名古墓一名佛據那凡十一國其中以福祿林司爲最東羅馬既滅各國散若星晨矣